

國朝耆獻類徵初編卷二百二十五目錄

守令十一

翁大中

李發枝

孫繼

包太隆

張遠

梁擇

劉鑑

譚中鼎

彭維銘

藍啟延

張德純

夏熙澤

武承謨

王誦

劉應中
權持世

陳廷弼
李長祚

蔡鵬
葛亮臣

姜修仁
李如湧

李架
趙士珩

王謙
潘大臺

傅澤浩
李為觀

沈光榮

黃任

秦文超

胡虞繼

張士琦

萬言

子承勳

朱霖

楊逢瓊 李天桂

竇容邃

王隆熙

魏嶺

方棨如

段獻生

補錄

黃任

趙河

國朝書牘類稿卷一百二十三

國朝耆獻類徵初編卷二百二十五

通奉大夫前署江西巡撫江西布政使司布政使湘陰李桓輯
守令十一

翁大中

漢史循吏傳所紀治行高第皆推本廉平以經術潤飾吏事者故
民多從化生有榮號死見奉祀又觀章帝元和詔曰安靜之吏惴
惴無華日計不足月計有餘由此言之故非刀筆者流一切趨於
武健嚴酷所可勝任愉快而後世則反是此吏治之所以日壞而
民不得被休養生息之澤也若上杭令林一翁君子以爲猶有兩
漢遺風焉杭爲汀州巖邑舊稱難治君平生性行馴謹絕不矜才

炫智當其銓授是邑也多以繁隲爲之鰓鰓慮者君莅任惟以潔己恤民自矢不移杭民正賦之外歲有加派平頭銀八百兩君曰民何以堪亟盡革之民遂大悅輸賦日例每由衙胥執簿挾衡任意勒索君令納戶自封投櫃民更便之杭地連邁旱災米價涌貴君請之上官開倉平糶其貧不能辦值者則捐俸給之全活無算杭民好訟乘隙搆忿輒食斷腸草以自殞株連煽害君必單騎親行檢勘真僞立辨刁風頓息其以田畝墳隴紛爭界域者亦必躬履其地而供應陋規槩與拒絕民閒婚媾失時議離構訟君委婉勸諭爲之捐助完娶貧民死而將暴露者亦許報名給之棺殮又葺城樓以復舊觀建營房以資防禦繕南溪橋梁以濟利涉並嚴

行溺女之禁宰牛之禁佃丁抗租之禁牙行包攬侵蝕之禁興利
剔弊釐然可紀尤以興行教化爲轉移風俗張本每月朔望祇謁
學宮宣講 聖諭十六條注解成書頒示鄉堡立義學於杭城四
隅擇師設教官給脩脯生童以時課試評論甲乙蒸蒸向風壬午
分校秋闈所得士皆寒畯在任五載頌聲洋溢四境謂賢父母以
養以教德意至渥也而君心力旣殫病遂不起卒之日杭之市肆
山村無不咨嗟流涕醵賻金助歸櫬呈請所司從祀名宦嗚呼此
豈可強而致者哉今天下民生況瘁矣司牧者不以民之父母自
待而民惟恐其戕我也使得如君者羅列於城社間庶幾瘡痍可
以甦息惜乎不得大展其用也君諱大中字林一蘇州常熟人中

康熙丁巳順天舉人爲予所得士丁丑成進士 賜第二甲出身
以辛巳年選上杭縣知縣會祖諱拱臣祖諱萬春皆 贈中大夫
父諱長庸順治丁亥進士累任河南布政使司參政分守河南道
妣王淑人大參公宦蹟清介晚年致政家居食貧宴如君淬厲學
問湛深經術不屑爲俗下浮靡之習飢驅四方備嘗艱苦及從兄
鐵庵公旣貴君在京師適館課徒亦絕不向朱門干謁故鉅公之
倡導聲氣者落落不與推挽且曰此固不識時務者爾自君薦賢
書遲回二十餘年卒博一第億綦甚矣而君喜愠終不形於言色
及其一行作吏獨能實心實政獲信於民如此此足以見華士虛
聲之不足尙而樸誠簡默者未必不爲 國家保惠黎元之一助

予故不得不爲之闡幽表微以爲可附於兩漢循吏之後者如君
固無媿也君卒於康熙丙戌年某月某日得年六十有五配某孺
人子三人偉國學生倭倖女若干人適某某孫四人汝弼汝爲汝
霖汝翼偉等卜吉於某鄉某字圩以某年某月某日葬銘曰

維學與仕合軌斯良謹身率先視民如傷醇儒立志體用偕臧何
彼俗吏繭絲皇皇脂膏腴削乃實篋筐波靡日甚誰飭官常有賢
司牧稱自上杭籍籍遺愛視昔桐鄉何以致之政績允彰曰廉曰
惠無怠無荒鞠躬盡瘁令名則長新封協卜鬱乎高岡吾作斯銘
徵信無忘宜爾子孫永懋烝嘗

右墓誌銘彭定求撰

李發枝

康熙乙酉江南總督劾罷江甯知府長沙陳公與上海知縣李君
上海民間君且頌繫人具一溢米或一束薪一本蔬醬肉隻雞各
效所有旦日恆滿戶外比去縣民走送者自縣門屬於黃浦潮水
至且沒膝垂涕跪泥淖中不忍去遠近傳爲異事陳公故負清名
後總督河道以死勤事而君與同被劾一時並稱良吏云上海號
難治以拳勇橫邑中者曰打降君捕繫其豪召受害者爲雪冤乃
散遣去許三月一至縣庭陳自新狀至則愷切開譬之大感悔迄
君去無敢逞淫祀曰五通神者湯文正公撫吳時亟斥之城南一
祠獨未毀民訴其妻爲神所憑厖羸不能起君莅祠坐堂皇呼病

國朝書牘卷之二十一
者驗視指衣朱神與夢肖君立焚之崇遂絕有以擣衣杵傷人額
致死者傷一縷細不及指囚抵傷械不相符獄不具君指案足問
曰若巨細與杵類乎曰然君令蘸墨其上而以素紙冒木板擊之
墨漬紙才一縷君曰額骨勝杵圓體所致傷有如是矣囚乃服
聖祖仁皇帝幸松江水次需挽舟卒所司輒先期拘繫之亡匿相
踵君所部五千人計口給直聽歸治所業與期會爲什伍集旁近
空寺中待發郡司馬猝至句驗無一卒大駭君曰無恐夫至矣走
一隸立寺門傳呼分青紅衣兩隊魚貫以出無一夫後者青浦雉
堞圯御舟計日且至令窘不知所爲上官以屬君君爲鳩工授
計畫浹日而竣人服其能邑人相驚以海寇至男婦奔迸城守將

禁弗止君恬若弗知令隸人徐行郊郭曰令君方視事若等何爲者民恃以無恐乃悉還其善應變率如此君旣罷家居垂二十年世宗憲皇帝登極有以君名聞者召見授深州知州時外僚多不次拔擢而君爲深州一年改教職去君早爲名諸生覃思強記借人書手自鈔撮若天官河渠樂律農田兵賦諸要務叩之娓娓應弗倦叢細奧僻亦靡所不記制舉義尤精銳試輒利曲阜顏公督學政最善鑑別拔君第一丙子鄉舉魁其經丁丑連捷成進士文皆爲一時所傳誦在上海好爲諸生評隲文字決利鈍如響多所成就至是得臨海教諭臨海陋邑也君不鄙棄其士課導之有方暇則爲當事陳所當興革攝仙居教諭協其令徵逋賦不擾

而集前訓導高某罷職貧不能歸君以俸入勸諸生爲治裝復歸其妻喪與人交敦古處篤故舊占咎書尺款曲周至陳公旣與君同患難相愛如骨肉比入直武英殿數爲當道有力者言君才前尙書張清恪公今 予告尙書徐公浙閩總督覺羅滿公皆嘗引以自助君居恆煦煦神內斂而精力常餘於事慨然思以吏治自見顧用不極其才云君諱發枝字鹿友浙江山陰人祖鳴皋世以孝聞皆於君深州任 誥贈奉直大夫君生順治丁酉終於乾隆丙辰年八十配趙宜人子男子四之屏之翰皆先卒之綱仁和縣學生之紀杭州府學生女子一孫七人某年月日葬某阡余與季君同爲諸生乙未丙申閒遇君於徐公所比來京師而君數致

問蠅頭細書纒纒累幅至今畱篋中故於銘弗忍辭銘曰
才所儲沛有餘弗昌其施誰實爲之吏乎師乎而止於斯乎殆酬
之以壽而蓄以貽諸其後乎

右墓誌銘汪由敦撰

當 世宗皇帝朝高安朱文端公在相位所薦引者吾浙得二人
一爲少宰沈端恪公一爲知深州事李公二公皆深於理學能以
經術飾吏治顧沈公躋通顯而李公不章其用調儒官以卒人皆
惜之卒於乾隆元年十二月二十二日子之綱等將擇某年某月
某日葬於某山之原伐石請銘按狀公諱發枝字鹿友別字培園
山陰人也曾祖允德祖尙成父鳴皋弱冠補學官弟子卽慨然有

志於道謂學以躬行爲要必先之以變化氣質又謂窮理乃儒者
分內事朱子門人張元德於子史百家山經地志之書無不研究
歷官皆有異蹟故公於書無不讀尤精用世之學中康熙丙子鄉
試丁丑成進士除知上海縣事上海於東南爲劇邑俗素黠而悍
好博簊競拳捷爲諸偷窟穴公始至廉得主名置其魁於法餘悉
勸諭使去期以三月一至縣呈自新狀至是民無敢犯有以衣杵
擊人額致死者左證已具驗其傷痕僅一綫囚將不服公曰是易
辨也折几足圖者墨其上擊白版痕亦如之獄遂定巡撫睢陽湯
公之斥五通淫祠也上海城南有祠未毀民訴婦爲神所憑幾殆
公詣祠命負婦至則指衣紅像公立命夷祠斧像投於火祟遂絕

婦因得瘥或騁而譁於途曰海寇至矣民相率奔避戍將禁之不止公聞之視事如故聞遣役出城諭民民見公不爲動遂稍稍還密覘之則譌言因估舶鱗集也白權使令事竣速去無滋擾民乃安巡撫商邱宋公聞之曰李令非獨治縣有譜其定變亦將才也將以治行第一薦會某制府好賕弗善公摭他事劾去之士庶遮畱弗絕於道間居二十年復以薦起知深州州地稍僻公一以安靜爲治舊有公使錢千緡公爲革除曰奈何以吾民膏血飾廚傳耶先是直隸州縣賣官米買補從田分配公以其病民力言於上官上官又弗善公左遷臨海教諭三年謝病歸年八十乃卒公孝友醇謹教人率以身先讀書日有程課臨海人士至今傳李公家

法云配宜人趙氏處士麒女賢明識大義事堂上兩世皆盡禮卒於乾隆五年五月二十五日年八十有五子四之屏太學生之翰之綱仁和縣學生之紀杭州府學生女一適周天任己丑進士孫七人孫女三人曾孫幾人銘曰

李公之學能定性經千百世相緯經不爲空言發於政先教後罰兼五聽焚禡毀廟邪不勝抑配病民以去諍起而復蹶悲蹢躅始信珞琖有三命晚罷儒官樂幽屏盡其天年與德稱劖銘繭室從子姓

右墓誌銘厲鶚撰

先生李氏名發枝字鹿友培園其號也山陰人爲學奇博多通而